



Republika e Kosovës – Republika Kosova  
Paneli Zgjedhor për Ankesa dhe Parashtresa  
Izborni Panel za Žalbe i Predstavke

ZL.Anr.560/2017

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Faton Ademi kryesues, Afijete Sada-Gllogjani dhe Zyhdi Haziri anëtarë, si dhe me pjesëmarrjen e Zyrtares së Lartë Ligjore Florije Krasniqi, duke vendosur përkitazi me apelin e kandidatit për kryetar të Komunës në Partesh, Nenad Cvetkovic nga radhët e subjektit politik GI Narodna Sloga në Komunën Partesh, paraqitur kundër Vendimit të Komisionit Qendror të Zgjedhjeve (KQZ) me seli në Prishtinë, që ka të bëjë me publikimin e rezultateve përfundimtare, për kryetar të Komunave, për Zgjedhjet Lokale të datës 22.10.2017, në seancën e panelit të mbajtur, me datë 02.11.2017, mori këtë:

## V E N D I M

**I. PRANOHET** si i bazuar apeli i kandidatit për kryetar të Komunës në Partesh, Nenad Cvetkovic nga radhët e subjektit politik GI Narodna Sloga, e cila mban shenjën ZL.Anr 560/2017, e datës 01.11.2017, **ANULOHEN** rezultatet e Zgjedhjeve Lokale të datës 22.10.2017, vetëm për kryetar Komune, në Qendrën e Votimit (QV) 3601d Budrigë e Poshtme, QV3602d Partesh dhe në QV3603d Pasjan, të gjitha në Komunën e Parteshit, për shkak të minimumit të integritetit të zgjedhjeve si rezultat i shpërblimit financiar me qëllim të përfitimit të mbështetjes së votuesve.

**II. URDHËROHET** Komisioni Qendror i Zgjedhjeve (KQZ) me seli në Prishtinë, ta përsërisë votimin vetëm për kryetar komune në Qendrën e Votimit (QV) 3601d Budrigë e Poshtme, QV3602d Partesh dhe në QV3603d Pasjan, të gjitha në Komunën e Parteshit.

## A r s y e t i m

PZAP-i më datë 01.11.2017, ka pranuar një apel nga kandidati për kryetar të Komunës në Partesh, Nenad Cvetkovic, nga subjekti politik GI Narodna Sloga, me të cilën ka pretenduar se me datë 01.11.2017, KQZ ka publikuar rezultatet përfundimtar për zgjedhjet lokale të datës 22 tetor 2017, dhe sipas këtij publikimi fitues i zgjedhjeve është Dragan Petković, kandidat nga radhët e subjektit politik Lista Serbe. Sipas parashtresës së ankesës këto zgjedhje kanë qenë të manipuluar dhe nuk e paraqesin vullnetin real të banorëve serb të kësaj komune sepse nuk janë eliminuar parregullsitë as me rastin e publikimit përfundimtar andaj dhe kërkojnë nga PZAP-i, që të anulohet procesi zgjedhor në Komunën e Parteshit, për shkak të manipulimit dhe blerjes së votave nga ana e subjektit politik Lista Serbe, dhe që

KQZ të obligohet që të organizoj zgjedhje të reja në këtë komunë. Në mbështetje të pretendimeve ankimore kanë bashkangjitur listën e rezultatit përfundimtar të Qendrës së Numërimit dhe Rezultateve (QNR), një CD-audio incizim lidhur me rastin në fjalë si dhe fotografi të printuara të SMS-ve.

Në përgjigjen në apel të datës 01.11.2017, Komisioni Qendror i Zgjedhjeve, ka theksuar se QNR-ja, të gjitha materialet sensitive dhe jo sensitive të cilat dorëzohen nga KVV-të dhe KKZ-të bënë verifikimin, hetimin dhe auditimin e materialeve zgjedhore dhe në rast se gjenë mospërputhje të rezultateve në mes FRP-ve dhe FRK-ve i rekomandon KQZ-së për rinumërim apo anulim të rezultati për vendvotimet e caktuara. Mirëpo, lidhur me rezultatet për Komunën e Parteshit, KQZ nuk ka gjetur arsye për ta bërë anulimin e rezultatit zgjedhor sipas pretendimeve për manipulim dhe keqpërdorim të votave.

Paneli, pasi që shqyrtoj pretendimet ankimore në kuptim të nenit 117 par.2 të LZP-së, në raport me provat të cilat gjinden në shkresat e lëndës, gjeti se:

#### **Apeli është i bazuar**

Nga CD-ja me Audio incizim Paneli në mënyrë të pakontestueshme vërtetohet faktin se personalisht kandidati për kryetar i Komunës së Parteshit Dragan Petković, nga radhët e subjektit politik Lista Serbe, bisedon me një person përmes telefonit, për mundësitë e shpërblimit financiar të votuesve nga 30 deri 50 euro, për votues, me mundësi që të njëjta mjete financiare do t'ia kthej shpërblyesit gjatë mandati katër vjeçar, me kamatë ligjore.

Nga Raporti Policor i datës 01.11.2017, Sektori Rajonal i Hetimeve në Gjilan-Njësiti i Hetimeve për vepra penale, vërtetohet se pikërisht për pretendimet që lidhen me procesin zgjedhor që janë në lidhshmëri me rastin që objekt i shqyrtimit, procedura penale ka filluar në drejtim të veprës penale "Dhënia ose marrja e ryshfetit në lidhje me votimin", veprë penale e sanksionuar me nenin 215 të KPRK-së.

Nga shkresa e Prokurorisë Themelore në Gjilan, e datës 02.11.2017, paneli vërteton se personalisht kandidati për kryetar të Komunës së Parteshit Dragan Petković, nga radhët e subjektit politik Lista Serbe, ka komunikuar përmes telefonit me Novica Shoshiq, i cili dyshohet se është përfaqësues i një këmbimorje në fshatin Shillovë, që të ju shpërndaj mjete financiare qytetarëve në këmbim të votës, në shumën nga 30 deri 50 euro. Po ashtu nga e njëjta shkresë e Prokurorisë Themelore në Gjilan, paneli konstatoi se personi me të cilën ka biseduar përmes telefonit kandidati për kryetar të Komunës së Parteshit Dragan Petković, në fazën e procedurës parapenale e ka pranuar se i ka shpërndarë 90 euro, tre personave nga 30 euro, në këmbim të votës, por pa e potencuar se a janë ato për zgjedhje apo kinse për çështje humane.

Paneli me rastin e vendosjes si në pikat -I- dhe -II-, të dispozitivit të këtij vendimi, është bazuar në dëshmi të qarta dhe bindës siç përcaktohen me nenin 117 par.3 të LZP-së, në të cilën përcaktohet se: "*Vendosja për apelet dhe ankesat nga PZAP-i, mbështetet në dëshmi të qarta dhe bindëse*" siç edhe ish-in në rastin konkret. Po ashtu pikat e lartpërmendura të

dispozitivit, paneli i ka bazuar edhe nenin 120 par.1 pika b), i LZP-së, në të cilin përcaktohet se: *“Para certifikimit të rezultateve zgjedhore është në kompetencë të PZAP-it, në raste të jashtëzakonshme të anulohet rezultatet në një vendotim apo qendër votimi, dhe ta urdhëroj KQZ-në të përsërisë votimin në një qendër votimi apo vendotim, nëse konsideron se ka ndikim në rezultatet finale”*. Në këtë rast paneli vlerëson se vetë fakti i kontaktimit të drejtpërdrejtë i një kandidati për kryetar komune, siç është në këtë rast Dragan Petković, me një përfaqësues të një këmbimorje, dhe nga i cili kërkon që t’i shpërblej votuesit me nga 30 euro apo 50 euro, e të cilat mjete vetë kandidati i premtonte shpërblyesit se do t’ia kthen gjatë mandatit katër vjeçar, rezultojnë se ka pas ndikim në rezultatit përfundimtar aq me shumë kur kemi të bëjmë me një komunë e cila përbëhet vetëm prej tri qendrave të votimeve, e të cilat parregullsi nuk janë eliminuar nga KQZ-ja edhe pse e njëjta ka qenë e njoftuar publikisht përmes RTK-së, me rastin e shpalljes së rezultateve për kryetar të komunave, për zgjedhjet lokale të datës 22.10.2017.

Për më tepër kandidati në fjalë nuk ka përmend numër të kufizuar se sa persona do të shpërblehen në këmbim të votës, ky veprim e minon në masë të madhe integritetin e zgjedhjeve dhe si rezultat i këtij minimi ndikon në rezultatit përfundimtar të zgjedhjeve për Komunën e Parteshit.

Vendimi i panelit, është vendim administrativ sipas LZP-së, me të cilin nuk paragjykohej sanksionimi penal që mund të pasoj, sipas nenit 120 par.5 të LZP-së.

Andaj, Paneli në kuptim të nenit 117, 118 dhe nenit 120 të LZP-së, vendosi si në dispozitiv të këtij vendimi.

### **Paneli Zgjedhor për Ankesa dhe Parashtrës**

Anr.560/2017 me datën 02.11.2017

**Kryesuesi i Panelit**

**Faton Ademi**

***Këshillë Juridike:*** Kundër këtij vendimi është e lejuar ankesa brenda njëzetekatër (24) orëve nga momenti i marrjes-pranimi të këtij vendimi Gjykatës Supreme të Kosovës.

